

四庫全書

子部

# 欽定四庫全書

子部

巢氏諸病源候總論卷

四十七至五十一

詳校官太醫院恩糧<sub>臣</sub>孔毓秀

編修<sub>臣</sub>倉聖脈覆勘

總校官庶吉士<sub>臣</sub>何思鈞

校對官中書<sub>臣</sub>吳俊

謄錄舉人<sub>臣</sub>楊兆豐

欽定四庫全書

巢氏諸病源候總論卷四十七

隋 巢元方 撰

小兒雜病諸候三 凡四十五論

注候

注之言住也謂其風邪氣留人身內也人無問大小若血氣虛衰則陰陽失守風邪鬼氣因而客之留在肌肉之間連滯腑臟之內或皮膚掣動遊易無常或心腹刺

痛或體熱皮腫沈滯至死死又注易傍人故為注也小兒不能觸冒風邪多因乳母解脫之時不避溫涼暑濕或抱持出入早晚其神魂軟弱而為鬼氣所傷故病也

尸注候

尸注者是五尸之中一尸注也人無問小大腹內皆有尸蠱尸蠱為性忌惡多接引外邪共為患害小兒血氣衰弱者精神亦羸故尸注因而為病其狀沈默不知知病處或寒熱淋瀝涉引歲月遂至於死死又注易傍人

故名之為尸注也

蟲注候

人聚蟲蛇雜類以器皿盛之令相噉食餘一存者即名為蟲能變化或隨飲食入腹食人五臟小兒有中者病狀與大人老子無異則心腹刺痛懊悶急者即死緩者涉歷歲月漸深羸困食心藏盡利血心藏爛乃至死死又注易傍人故為蟲注也

陰腫候

足少陰為腎之經其氣下通於陰小兒有少陰之經虛而受風邪者邪氣衝於陰與血氣相搏結則陰腫也

腹脹候

腹脹是冷氣客於藏故也小兒腑臟嫩弱有風冷邪氣客之搏於藏氣則令腹脹若脾虛冷移入於胃食則不消若腸虛冷氣乘之則變下利

霍亂候

霍亂者陰陽清濁二氣相干謂之氣亂氣亂於腸胃之

間為霍亂也小兒腸胃嫩弱因解脫逢風冷乳哺不消而變吐利也或乳母觸冒風冷食飲生冷物皆冷氣流入乳令乳變敗兒若飲之亦成霍亂吐利皆是觸犯腑臟使清濁之氣相干故霍亂也挾風而絡實者則身發熱頭痛骨疼而復吐利凡小兒霍亂皆須暫斷乳亦以藥與乳母服令血氣調適乳汁溫和故也小兒吐利不止血氣變亂即發驚癇也

吐利候

吐利者由腸虛而胃氣逆故也小兒有解脫而風冷入腸胃腸胃虛則泄利胃氣逆則嘔吐此大體與霍亂相似而小輕不劇悶頓故直云吐利亦不呼為霍亂也

服湯中毒毒氣吐下候

春夏以湯下小兒其腸胃脆嫩不勝藥勢遂吐下不止藥氣熏臟腑乃煩懊頓乏者謂此為中毒毒氣吐下也

嘔吐逆候

兒啼未定氣息未調乳母忽遽以乳飲之其氣尚逆乳



不得下停滯胃腸則胃滿氣急令兒嘔逆變吐又乳母將息取冷冷氣入乳乳變壞不捨除之仍以飲兒冷乳入腹與胃氣相逆則腹脹痛氣息喘急亦令嘔吐又解脫換易衣裳及洗浴露兒身體不避風冷風冷因客膚腠搏血氣則熱入於胃則腹脹痛而嘔吐也凡如此風冷變壞之乳非直令嘔吐腸虛入於胃大腸則為利也

### 噦候

小兒噦由哺乳冷冷氣入胃與胃氣相逆冷折胃氣不

通則令噦也

吐血候

小兒吐血者是有熱氣盛而血虛熱乘於血血性得熱則流散妄行氣逆即血隨氣上故令吐血也

難乳候

凡小兒初生看產人見兒出急以手料拭兒口無令惡血得入兒腹則兒腹內調和無有疾病若料拭不及時則惡血穢露兒咽入腹令心腹否滿短氣兒不能飲乳

謂之難乳

又云兒在胎之時母取冷過度冷氣入胞令兒著冷至  
兒生出則喜腹痛不肯飲乳此則胎寒亦名難乳也

吐哕候

小兒吐哕者由乳哺冷熱不調故也兒乳哺不調則停  
積胃膈因更飲乳哺前後相觸氣不得宣流故吐哕出  
診其脈浮者無苦也

百病候

小兒百病者由將養乖節或犯寒溫乳哺失時乍傷飢飽致令血氣不理腸胃不調或欲發驚癇或欲成伏熱小兒氣血脆弱病易動變證候百端若見其微證即便治之使不成衆病故謂之百病也治之若晚其病則成凡諸病至於困者汗出如珠著身不流者死也病如胃陷者其口脣乾目反張口中氣出冷足與頭相柱臥不舉手足四肢垂其臥正直如縛得其掌中冷至十日必死不可治也

頭身喜汗出候

小兒有血氣未實者膚腠則疎若厚衣溫臥腑臟生熱蒸發腠理津液泄越故令頭身喜汗也

盜汗候

盜汗者眠睡而汗自出也小兒陰陽之氣嫩弱腠理易開若將養過溫因睡臥陰陽氣交津液發泄而汗自出也

痰候

痰者水飲停積胃膈之間結聚痰也小兒飲乳因冷熱不調停積胃膈之間結聚成痰痰多則令兒飲乳不下吐涎沫變結而微壯熱也痰實壯熱不止則發驚癇

胃膈有寒候

三焦不調則寒氣獨留膈上不通則令兒乳哺不得消下噫氣酸臭胃膈否滿甚則氣息喘急

癥瘕癖結候

五臟不和三焦不調有寒冷之氣客之則令乳哺不消

化結聚成癥癖也其狀按之不動有形段者癥也推之浮移者癖也其弦急牢強或在左或在右癖也皆由冷氣痰水食飲結聚所成故云癥癖結也

舌結候

舌者塞也小兒胃膈熱實腹內有留飲致令榮衛舌塞腑臟之氣不宣通其痛腹內氣結脹滿或時壯熱是也

宿食不消候

小兒宿食不消者脾胃冷故也小兒乳哺飲食取冷過

度冷氣積於脾胃脾胃則冷胃為水穀之海脾氣磨而消之胃氣和調則乳哺消化若傷於冷則宿食不消診其三部脈沈者乳不消也

傷飽候

小兒食不可過飽飽則傷脾脾傷不能磨消於食令小兒四肢沈重身體苦熱面黃腹大是也

食不知飽候

小兒有嗜食食已仍不知飽足又不生肌肉其亦腹大



其大便數而多泄亦呼為豁治此腸胃不守故也

哺露候

小兒乳哺不調傷於脾胃脾胃衰弱不能飲食血氣減損不榮肌肉而柴辟羸露其腑臟之不宣則吸吸苦熱謂之哺露也

大腹丁奚候

小兒丁奚病者由哺食過度而脾胃尚弱不能磨消故也哺食不消則水穀之精減損無以榮其氣血致肌肉

消瘠其病腹大頸小黃瘦是也若久不瘥則變成穀癥傷飽一名哺露一名丁奚三種大體相似輕重立名也

洞泄下利候

春傷於風夏為洞泄小兒有春時解脫衣服為風冷所傷藏在肌肉至夏因飲食居處不調又被風冷入於腸胃先後重沓為風邪所乘則下利也其冷氣盛利甚為洞泄洞泄不止為注下也凡注下不止者多變驚癇所以然者本挾風邪因利臟虛風邪乘之故也亦變眼痛生障

下焦偏冷熱結上焦熏於肝故也

利後虛羸候

腸胃虛弱受風冷則下利利斷之後脾胃尚虛穀氣猶少不能榮血氣故虛羸也

赤白滯下候

小兒體本挾熱忽為寒所折血氣不調大腸虛弱者則冷熱俱乘之熱搏血滲腸間其利則赤冷搏腸津液凝其利則白冷熱相交血滯相雜腸虛者泄故為赤白滯

下也

赤利候

小兒有挾客熱客熱入於經絡而血得熱則流散滲入大腸腸虛則泄故為赤利也

熱利候

小兒本挾虛熱而為風所乘風熱俱入於大腸而利為熱是水穀利而色黃者為熱利也

冷利候

小兒腸胃虛或解脫遇冷或飲食傷冷冷氣入於腸胃而利其色白是為冷利也冷甚則利青也

冷熱利候

小兒先因飲食有冷氣在腸胃之間而復為熱氣所傷而腸胃宿虛故受於熱冷熱相交而變下利乍黃乍白或水或穀是為冷熱利也

卒利候

小兒卒利者由腸胃虛暴為冷熱之氣所傷而為卒利

熱則色黃赤冷則色青白若冷熱相交則變為赤白滯利也

久利候

春傷於風至夏為洞泄小兒春時解脫為風所傷藏在肌肉至夏因為水穀利經久連滯不瘥也凡水穀利久腸胃虛易為冷熱得冷則變白膿得熱則變赤血若冷熱相加則赤白相雜利久則變腫滿亦變病蠶亦令嘔噦皆由利久脾胃虛所為也

重下利候

重下利者此是赤白滯下利而挾熱多者熱結肛門利不時下而久嘔氣謂之重下利也

利如膏血候

此是赤利腸虛極腸間脂與血俱下故謂利如膏血也

蠱毒利候

歲時寒暑不調而有毒厲之氣小兒解脫為其所傷邪與血氣相搏入於腸胃毒氣蘊積值大腸虛者則變利

血其利狀血色蘊瘀如鷄鴨肝片隨利下此是毒氣盛  
熱食於人臟狀如中蠱故謂之蠱毒利也

利兼渴候

此是水穀利津液枯竭腑臟虛燥則引飲若小便快者  
利斷渴則止若小便澁水不行於小腸滲入腸胃渴亦  
不止利亦不斷凡如此者皆身體浮腫脾氣弱不能剋  
水故也亦必眼痛生障小兒上焦本熱今又利下焦虛  
上焦熱氣轉盛熱氣熏肝故也



被魃候

小兒所以有魃病者婦人懷娠有惡神導其腹中胎妬嫉而制伏他小兒令病也任娠婦人不必悉能制魃人時有此耳魃之為疾喜微微下寒熱有去來毫毛髮鬢鬢不悅是其證也

驚啼候

小兒驚啼者是於眠睡裏忽然啼而驚覺也由風熱邪氣乘於心則心臟生熱精神不定故卧不安則驚而啼

也

夜啼候

小兒夜啼者藏冷故也夜陰氣盛與冷相搏則冷動冷動與藏氣相并或煩或痛故令小兒夜啼也然亦有犯觸禁忌亦令兒夜啼則可法術斷之

軀啼候

小兒在胎則其母將養傷於風冷邪氣入胞傷兒臟腑故兒生之後邪猶在兒腹內邪動與正氣相搏則腹痛

故兒軀張蹙氣而啼

胎寒候

小兒在胎時其母將養取冷過度冷氣入胞傷兒腸胃  
故兒生之後冷氣猶在腸胃之間其狀兒腸胃冷不能  
消乳哺或腹脹或時谷利令兒顏色素肥時啼者是胎  
寒故也

腹痛候

小兒腹痛多由冷熱不調冷熱之氣與臟腑相擊故痛

也其熱而痛者則面赤或壯熱四肢煩手足心熱是也  
冷而痛者面色或青或白甚者乃至面黑唇口爪皆青  
是也

心腹痛候

小兒心腹痛者腸胃宿挾冷又暴為寒氣所加前後冷  
氣重沓動與藏氣相搏隨氣上下衝擊心腹之間故令  
心腹痛也

巢氏諸病源候總論卷四十七

欽定四庫全書

巢氏諸病源候總論卷四十八

隋 巢元方 撰

小兒雜病諸候四

凡四十六論

解顱候

解顱者其狀小兒年大顱應合而不合頭縫開解是也  
由腎氣不成故也腎主骨髓而腦為髓海腎氣不成則  
髓腦不足不能結成故頭顱開解也

凶填候

小兒凶填由乳哺不時飢飽不節或熱或寒乘於脾胃致腑臟不調其氣上衝所為也其狀凶張如物填其上汗出毛髮黃而短者是也若寒氣上衝即牢慄熱氣上衝即柔軟又小兒脅下有積又氣滿而體熱熱氣乘於藏藏氣上衝於腦凶亦致凶填又欬且啼而氣乘藏上衝亦病之啼甚久其氣未定因而乳之亦令凶填所以然者方啼之時陰陽氣逆上衝故也

白陷候

此謂白陷下不平也由腸內有熱熱氣熏藏臟熱即渴引飲而小便洩利者即腑臟血氣虛弱不能上充髓腦故白陷也

重舌候

小兒重舌者心脾熱故也心候於舌而主於血脾之絡脈又出舌下心火脾土二臟母子也有熱即血氣俱盛其狀附舌下近舌根生形如舌而短故謂之重舌

滯頤候

滯頤之病是小兒多涎唾流出漬於頤下此由脾冷液多故也脾之液為涎脾氣冷不能收制其津液故令涎流出滯漬於頤也

中風候

小兒血氣未定肌膚脆弱若將養乖宜寒溫失度腠理虛開即為風所中也凡中風皆從胃諸臟俞入若心中風但得偃臥不得傾側汗出脣赤若汗流者可治急灸



心俞若唇或青或白或黃或黑此是心壞為水面目亭  
亭時悚動皆不復可治五六日而死者肝中風踞坐不  
得低頭若繞兩目連額上色微有青唇色青而面黃可  
治急灸肝俞若大青黑面一黃一白者是肝已傷不可  
復治數日而死若脾中風踞而腹滿身通黃吐鹹汁出  
者可治急灸脾俞若手足青者不可復治也若腎中風  
踞而腰痛視脇左右未有黃色如餅糝大者可治急灸  
腎俞若齒黃赤鬚髮直而土色不可治也肺中風偃卧

而胃滿短氣冒悶汗出視目下鼻上下兩邊下行至口  
色白可治急灸肺俞若黃為肺已傷化為血不可復治  
也其人當要掇空或自拈衣如此數日而死此五臟之  
中風也其年長成童者灸皆百壯若五六歲已下至於  
嬰兒灸者以意消息之凡嬰兒若中於風則的成癰癩  
也

中風四肢拘攣候

小兒肌肉脆弱易傷於風風冷中於膚腠入於經絡風

冷搏於筋脈筋脈得冷即急故使四肢拘攣也

中風不隨候

夫風邪中於肢節經於筋脈若風挾寒氣者即拘急攣痛若挾於熱即緩縱不隨

白虎候

按堪輿歷遊年圖有白虎神云太歲在卯即白虎在寅準此推之知其神所在小兒有居處觸犯此神者便能為病其狀身微熱有時啼喚有時身小冷屈指如數似

風癰但手足不痿痺耳

卒失音不能語候

喉嚨者氣之道路喉厭者音聲之門戶有暴寒氣客於喉厭喉厭得寒即不能發聲故卒然失音也不能語者語聲不出非牙關噤也

中風口噤候

小兒中風口噤者是風入頷頰之筋故也手三陽之筋入結頷頰足陽明之筋上夾於口膚腠虛受風冷客於

諸陽之筋筋得寒冷則攣急故機關不利而口噤也

中風口喎邪僻候

小兒中風口喎邪僻是風入於頷頰之筋故也足陽明之筋上夾於口手三陽之脈偏急而口喎邪僻也

中風痙候

小兒風痙之病狀如癇而背脊項頸強直是風傷太陽之經小兒解脫之臍瘡未合為風所傷皆令發痙

羸瘦候

夫羸瘦不生肌膚皆為脾胃不和不能飲食故血氣衰弱不能榮於肌膚凡小兒在胎而遇寒冷或生而挾伏熱皆令兒不能飲食故羸瘦也挾熱者即溫壯身熱肌肉微黃其挾冷者即時時下利唇青

虛羸候

此由小兒經諸大病或驚癇或傷寒或溫壯而服藥或吐利發汗病瘥之後血氣尚虛脾胃猶弱不能傳化穀氣以榮身體故氣力虛而羸也

# 嗽候

嗽者由風寒傷於肺也肺主氣候皮毛而俞在於背小兒解脫風寒傷皮毛故因從肺俞入傷肺肺感微寒即嗽也故小兒生須常暖背夏月亦須單背襠若背冷得嗽月內不可治百日內嗽者十中一兩瘥耳

## 欬逆候

欬逆由乳哺無度因挾風冷傷於肺故也肺主氣為五臟上蓋在胃間小兒啼氣未定因而飲乳乳與氣相逆

氣相引乳射於肺故欬而氣逆謂之欬逆也冷乳冷哺傷於肺搏於肺氣亦令欬逆也

病氣候

肺主氣肺氣有餘即喘欬上氣若又為風冷所加即氣聚於肺令肺脹即胃滿氣急也

腫滿候

小兒腫滿由將養不調腎脾二臟俱虛也腎主水其氣下通於陰脾主土候肌肉而剋水腎虛不能傳其水液



脾虛不能剋制於水故水氣流溢於皮膚故令腫滿其挾水腫者即皮薄如熟李之狀也若皮膚受風風搏而氣致腫者但虛腫如吹此風氣腫也

毒腫候

毒腫是風熱濕氣搏於皮膚使血氣澀不行蘊積成毒其腫赤而熱是也

耳聾候

小兒患耳聾是風入頭腦所為也手太陽之經入於耳

內頭腦有風風邪隨氣入乘其脈與氣相搏風邪停積  
即令耳聾

耳鳴候

手太陽之經脈入於耳內小兒頭腦有風者風入乘其  
脈與氣相擊故令耳鳴則邪氣與正氣相擊久即邪氣  
停滯皆成聾也

中風掣痛候

小兒耳鳴及風掣痛其風染而皆起於頭腦有風其風

入經脈與氣相動而作故令掣痛其風染而漸至與正氣相擊輕者動作幾微故但鳴也其風暴至正氣又盛相擊則其動作疾急故掣痛也若不止則風不散津液壅聚熱氣加之則生黃汁甚者亦有薄膿也

### 聾耳候

耳宗脈之所聚腎氣之所通小兒腎臟盛而有熱者熱氣上衝於耳津液壅結即生膿汁亦有因沐浴水入耳內而不傾瀝令盡水濕停積搏於血氣蘊結成熱亦令

膿汁出皆為之疔耳久不瘥即變成龍耳也

目赤痛候

肝氣通於目臟內客熱與胃腸痰飲相搏熏漬於肝肝熱氣衝發於目故令目赤痛也甚則生翳

眼障翳候

眼是腑臟之精華肝之外候而肝氣通於眼也小兒腑臟痰熱熏漬於肝衝發於眼初只熱痛熱氣蘊積變生障翳熱氣輕者止生白翳結聚小者如黍粟大者如麻

豆隨其輕重輕者止生一翳重者乃至兩三翳也若不  
生翳而生白障者是疾重極徧覆黑睛滿眼悉白則失  
明也其障亦有輕重輕者黑睛邊微有白膜來侵黑睛  
漸染散漫若不急治熱勢即重滿目併生白障也

### 目盲候

眼無障翳而不見物謂之盲此由小兒臟內有停飲而  
無熱但有飲水積滯於肝也目是五臟之精華肝之外  
候也肝氣通於目為停飲水滯臟氣不宣和精華不明

審故不赤痛亦無障翳而不見物故名青盲也

雀目候

人有晝而睛明至暝便不見物謂之雀目言如鳥雀暝便無所見也

緣目生瘡候

風邪客於瞼眥之間與血氣相搏挾熱即生瘡浸漬緣目赤而有汁時瘥時發世云小兒初生之時洗浴兒不淨使穢露津液浸漬眼瞼眥皆後遇風邪發即目赤爛

生瘡喜難瘡瘡後還發成疹世人謂之胎赤

鼻衄候

小兒經脈血氣有熱喜令鼻衄夫血之隨氣循行經脈  
通遊腑臟若冷熱調和行依其常度無有壅滯亦不流  
溢也血性得寒即凝澀結聚得熱即流散妄行小兒熱  
盛者熱乘於血血隨氣發溢於鼻者謂之鼻衄凡人血  
虛受熱即血失其常度發溢妄行乃至發於七竅謂之  
大衄也

蠶鼻候

蠶鼻之狀鼻下兩邊赤發時微有瘡而痒是也亦名赤鼻亦名疳鼻然鼻是肺氣所通肺候皮毛其氣不和風邪客於皮毛次於血氣夫邪在血氣隨虛處而入停之其停於鼻兩邊與血氣相搏成瘡者謂之蠶鼻也

顰鼻候

肺主氣而通於鼻而氣為陽諸陽之氣上榮頭面若氣虛受風冷風冷客於頭腦即其氣不和令氣停滯搏於



津液膿涕結聚即鼻不聞香臭謂之齕

鼻塞候

肺氣通於鼻而氣為陽諸陽之氣上榮頭面其氣不和受風冷風冷邪氣入於腦停滯鼻間即氣不宣和結聚不通故鼻塞也

喉痺候

喉痺是風毒之氣客於咽喉之間與血氣相搏而結腫塞飲粥不下乃成膿血若毒入心心即煩悶懊懣懷不可

堪忍如此者死

馬痺候

馬痺與喉痺相似亦是風熱毒氣客於咽喉頷頰之間與血氣相搏結聚腫痛其狀從頷下腫連頰下應喉內腫痛塞水漿不下甚者膿潰毒若攻心則心煩懊悶致死

齒不生候

齒是骨之所終而為髓之所養也小兒有稟氣不足者

髓即不能充於齒骨故齒久不生

齒痛風齲候

手陽明足太陽之脈並入於齒風氣入其經脈與血氣相搏齒即腫痛膿汁出謂之風齲

齒根血出候

手陽明足太陽之脈並入於齒小兒風氣入其經脈與血相搏血氣虛熱即齒根血出也

數歲不能行候

小兒生自變蒸至於能語隨日數血脈骨節脩成其臍骨成即能行骨是髓之所養若稟生血氣不足者即髓不充強故其骨不即成而數歲不能行也

鶴節候

小兒稟生血氣不足即肌肉不充肢體柴瘦骨節皆露如鶴之腳節也

頭髮黃候

足少陰為腎之經其血氣華於髮若血氣不足則不能

潤悅於髮故髮黃也

頭髮不生候

足少陰為腎之經其華在髮小兒有稟性少陰之血氣不足即髮踈薄不生亦有因頭瘡而禿落不生者皆由傷損其血血氣損少不能榮於髮也

昏塞候

人有稟性陰陽不和而心神昏塞者亦有因病而精米闇鈍皆由陰陽之氣不足致神識不分明

落床損瘀候

血之在身隨氣而行常無停積若因墮落損傷即血行失度隨傷損之處即停積若流入腹內亦積聚不散皆成瘀血凡瘀血在內顏色痿黃氣息微喘漉漉小寒噓噓微熱或時損痛也

脣青候

小兒臟氣不和血虛為冷所乘即口脣青肥亦有臟氣熱脣生瘡而風冷之氣入瘡雖瘥之後血色不復故令

脣青

無辜病候

小兒面黃髮直時壯熱飲食不生肌膚積經日月遂致死者謂之無辜言天上有鳥名無辜晝伏夜遊洗浣小兒衣席露之經宿此鳥即飛從上過而取此衣與小兒著并席與小兒卧便令兒著此病

巢氏諸病源候總論卷四十八



欽定四庫全書

巢氏諸病源候總論卷四十九

隋 巢元方 撰

小兒雜病諸候五

凡五十論

丹候

風熱毒氣客於腠理熱毒搏於血氣蒸發於外其皮上  
熱而赤如丹之塗故謂之丹也若久不瘥即肌肉爛傷  
五色丹候

五色丹發而改變無常或青黃白黑赤此由風毒之熱有盛有衰或冷或熱故發為五色丹也

赤黑丹候

丹病本是毒熱折於血氣蘊蒸色赤而復有冷氣乘之冷熱互交更相積瘀令色赤黑

白丹候

丹初是熱毒挾風熱搏於血積蒸發赤也熱輕而挾風多者則其色微白也

丹火候

丹火之狀發赤如火之燒須臾燥漿起是也

天火丹候

丹發竟身體斑赤如火之燒故謂之天火丹也

伊火丹候

丹發於髀骨青黑色謂之伊火丹也

燍火丹候

丹發於臂背穀道者謂之燍火丹也

骨火丹候

丹發初在臂起正赤若黑謂之骨火丹也

厲火丹候

丹發初從髁下起皆赤能移走謂之厲火丹也

火丹候

火丹之狀徃徃如傷赤著身而日漸大者謂之火丹也

飛火丹候

丹著兩臂及背膝謂之飛火丹也

遊火丹候

丹發兩臂及背如火炙者謂之遊火丹也

殃火丹候

丹發兩脅及腋下髀上謂之殃火丹也

尿竈火丹候

丹發膝上從兩股起及臍間走入陰頭謂之尿竈火丹也

風火丹候

丹初發肉黑忽腫起謂之風火丹也

暴火丹候

暴火丹之狀帶黑肥色謂之暴火丹也

留火丹候

留火丹之狀發一日一夜便成瘡如棗大正赤色謂之留火丹也

朱田火丹候

丹先發背起徧身一日一夜而成瘡謂之朱田火丹也

鬱火丹候

丹發從背起謂之鬱火丹也

神火丹候

丹發兩髀不過一日便赤黑謂之神火丹也

天竈火丹候

丹發兩髀裏尻間正赤流陰頭赤腫血出謂之天竈火丹也

鬼火丹候

丹發兩臂赤起如李子謂之鬼火丹也

石火丹候

丹發通身自突起如細粟大色青黑謂之石火丹也

野火丹候

丹發赤斑斑如梅子竟背腹謂之野火丹也

茱萸火丹候

丹發初從背起徧身如細纈謂之茱萸火丹也

家火丹候



丹初發著兩腋下兩臂上名之曰家火丹也

廢竈火丹候

丹發從足趺起正赤者謂之廢竈火丹也

螢火丹候

丹發如灼在脅下正赤初從髂起而長上痛是螢火丹也

赤丹候

此謂丹之純赤色者則是熱毒搏血氣所為也

風瘙隱胗候

小兒因汗解脫衣裳風入腠理與血氣相搏結聚起相連成隱胗風氣止在腠理浮淺其勢微故不腫不痛但成隱胗瘙痒耳

卒腹皮青黑候

小兒因汗腠理則開而為風冷所乘冷搏於血隨肌肉虛處停之則血氣沈澀不能榮其皮膚而風冷客於腹皮故青黑

藍注候

小兒為風冷乘其血脈血得冷則結聚成核其皮肉色如藍乃經久不歇世謂之藍注

身有赤處候

小兒因汗為風邪毒氣所傷與血氣相搏熱氣蒸發於外其肉色赤而壯熱是也

赤遊腫候

小兒有肌肉虛者為風毒熱氣所乘熱毒搏於血氣則

皮膚赤而腫起其風隨氣行遊不定故名赤遊腫也

大便不通候

小兒大便不通者腑臟有熱乘於大腸故也脾胃為水穀之海水穀之精華化為血氣其糟粕行於大腸若三焦五臟不調和熱氣歸於大腸熱實故大便燥澀不通也

大小便不利候

小兒大小便不利者腑臟冷熱不調大小腸有遊氣氣

壅在大小腸不得宣散故大小便澀不流利也

大小便血候

心主血脈心臟有熱熱乘於血血性得熱流散妄行不依常度其流滲於大小腸者故大小便血也

尿血候

血性得寒則凝澀得熱則流散而心主於血小兒心臟有熱乘於血血滲於小腸故尿血也

痔候

痔有牡痔牝痔脈痔腸痔血痔酒痔皆因勞傷過度損動血氣所生小兒未有虛損而患痔止是大便有血出腸內有結熱故也

小便不利候

小便不利者腎與膀胱熱故也此二經為表裏俱主水水行於小腸入胞為小便熱氣在其臟腑水氣則澀故小便不利也

大小便數候

脾與胃合胃為水穀之海水穀之精化為血氣以行經脈其糟粕水液行之於大小腸若三焦平和則五臟調適虛實冷熱不偏其脾胃氣弱大小腸偏虛下焦偏冷不能制於水穀者故令大小便數也

諸淋候

小兒諸淋者腎與膀胱熱也膀胱與腎為表裏俱主水水入小腸下於胞行於陰為小便也腎氣下通於陰陰水液之道路膀胱津液之府膀胱熱津液內溢而流於

澤水道不通水不上不下停積於胞腎氣不通於陰腎熱其氣則澀故令水道不利小便淋瀝故謂為淋其狀小便出少起數小腹急痛引臍是也又有石淋氣淋熱淋血淋寒淋諸淋形證隨名具說於後章而以一方治之者故謂諸淋也

石淋候

石淋者淋而出石也腎主水水結則化為石故腎容砂石腎為熱所乘熱則成淋其狀小便莖中痛尿不能卒



出時自痛引小腸膀胱裏急砂石從小便道出甚者水道塞痛令悶絕

氣淋候

氣淋者腎虛膀胱受肺之熱氣氣在膀胱膀胱則脹肺主氣氣為熱所乘故流入膀胱膀胱與腎為表裏膀胱熱則氣壅不散小腹氣滿水不宣利故小便澀成淋也其狀膀胱小腹滿尿澀常有餘瀝是也亦曰氣癰診其少陰脈數者男子則氣淋也

熱淋候

熱淋者三焦有熱氣傳於腎與膀胱而熱氣流入於胞而成淋也

血淋候

血淋者是熱之甚盛者則尿血謂之血淋心主血血之行身通徧經絡循環腑臟其熱甚者血即散失其常經溢滲入胞而成血淋矣

寒淋候

寒林者其病狀先寒戰然後尿是也小兒取冷過度下焦受之冷氣入胞與正氣交爭寒氣勝則戰寒正氣勝則戰寒解故得小便也

### 小便數候

小便數者膀胱與腎俱有客熱乘之故也腎與膀胱為表裏俱主水腎氣下通於陰此二經既受客熱則水行澀故小便不快而起數也

### 遺尿候

遺尿者此由膀胱有冷不能約於水故也足太陽為膀胱之經足少陰為腎之經此二經為表裏腎主水腎氣下通於陰小便者水液之餘也膀胱為津液之府既冷氣衰弱不能約水故遺尿也

巢氏諸病源候總論卷四十九

欽定四庫全書

巢氏諸病源候總論卷五十

隋 巢元方 撰

小兒雜病諸候六 凡五十一論

三蟲候

三蟲者長蟲赤蟲蛭蟲為三蟲也猶是九蟲之數也長蟲蛭蟲也長一尺動則吐清水而心痛貫心即死赤蟲狀如生肉動則腸鳴蛭蟲至細微形如菜蟲也居脘腸

間多則為痔劇則為癰因人瘡處以生諸癰疽癰癰癰  
疥齕蟲無所不為此既九蟲之內三者而今則別立名  
當以其三種偏發動成病故謂之三蟲也

虯蟲候

虯蟲者九蟲內之一蟲也長一尺亦有長五六寸者或  
因腑臟虛弱而動或因食甘肥而動其動則腹中痛發  
作腫聚行來上下痛有休止亦攻心痛口喜吐涎及清  
水貫傷心者則死診其脈腹中痛其脈法當沉弱而弦今

反脈洪而大則是蜺蟲也

蜺蟲候

蜺蟲者九蟲內之一蟲也形甚細小如今之癘蟲狀亦因腑臟虛弱而致發甚者則成痔瘻癰疥也

寸白蟲候

寸白者九蟲內之一蟲也長一寸而色白形小扁因腑臟虛弱而能發動或云飲白酒一云以桑樹枝貫串牛肉炙并食生粟所作或云食生魚後即食乳酪亦令生

之其發動則損人精氣腰脚疼弱又云此蟲生長一尺則令人死也

脫肛候

脫肛者肛門脫出也肛門大腸之候小兒患肛門脫出多因利方腸虛冷兼用軀氣故肛門脫出謂之脫肛也

病癰候

癰者陰核氣結腫大也小兒患此者多因啼哭軀氣不止動於陰氣陰氣而擊結聚不散所成也



差癰候

差癰者陰核偏腫大亦由啼哭軀氣擊於下所致其偏腫者氣偏乘虛而行故偏結腫也

狐臭候

人有血氣不和腋下有如野狐之氣謂之狐臭而此氣能染易著於人小兒多是乳養之人先有此病染著小兒

四五歲不能語候

人之五臟有五聲心之聲為言小兒四五歲不能言者由在胎之時其母卒有驚怖內動於兒臟邪氣乘其心令心氣不和至四五歲不能言語也

氣癭候

氣癭之狀頸下皮寬內結突起臃臃然亦漸長大氣結所成也小兒啼未止因以乳飲之令氣息喘逆不得消散故結聚成癭也

胷脅滿痛候

看養小兒有失節度而為寒冷所傷寒氣入腹內乘虛停積後因乳哺冷熱不調觸冒宿寒與氣相擊不散在於膏脅之間故令滿痛也

服湯藥中毒候

小兒有痼患服湯藥其腸胃脆嫩不勝藥氣便致煩毒也故謂之中毒

蠅蝮毒繞腰痛候

蠅蝮蟲長一寸許身有毛如毫毛長五六分脚多而甚

細足處屋壁之間云其遊走遇人則尿人影隨所尿著影處人身即應之生瘡世病之者多著腰瘡初生之狀匝匝起初結痞癰小者如黍粟大者如麻豆染漸生長濶大繞腰生膿汁成瘡也

疣目候

人有附皮肉生與肉色無異如麥豆大謂之疣子即疣目也亦有三數相聚生者割破裏狀如筋而強亦微有血面小復生此多由風邪客於皮膚血氣變化所生故

亦有藥治之瘡者亦有法術治之瘡者而多生於手足也

頭瘡候

腑臟有熱熱氣上衝於頭而復有風濕乘之濕熱相搏折血氣而變生瘡也

頭多蟲生瘡候

蟲者按九蟲論云蜣蟲多所變化亦變為蟲而小兒頭櫛沐不時則蟲生滋長偏多嚙頭遂至生瘡瘡處蟲聚

也謂之蝨窠然人體性自有偏多蝨者

白禿候

白禿之候頭上白點斑剝初似癬而上有白皮屑久則生痂瘰成瘡遂至偏頭洗刮除其痂頭皮瘡孔如筋頭大裏有膿汁出不痛而有微痒時其裏有蟲甚細微難見九蟲論亦云是蛻蟲動作而成此瘡乃至自小及長大不瘥頭髮禿落故謂之白禿也

頭面身體諸瘡候

腑臟熱甚熱氣衝發皮膚而外有風濕折之與血氣相搏則生瘡甚壯初赤起痞癰後乃生膿汁隨瘡隨發或生身體或出頭面或身體頭面皆有也

惡瘡候

夫人身體生瘡皆是臟熱衝外外有風濕相搏所生而風濕之氣有挾熱毒者其瘡則痛痒腫焮久不瘥故名惡瘡也

燥瘡候

小兒為風熱毒氣所傷客於皮膚生燔漿而潰成瘡名為燔瘡也

瘰癧候

小兒身生熱瘡必生瘰癧其狀作結核在皮肉間三兩箇相連累也是風邪搏於血氣凝結所生也

惡核候

惡核者是風熱毒氣與血氣相搏結成核生頸邊又遇風寒所折遂不消不潰名為惡核也



# 漆瘡候

人無問男女大小有稟性不耐漆者見漆及新漆器便著漆毒令頭面身體腫起隱胗色赤生瘡痒痛是也

# 癰瘡候

六腑不和寒氣客於皮膚寒搏於血則壅遏不通稽留於經絡之間結腫頭成癰其狀腫上皮薄而澤是也熱氣乘之熱勝於寒則肉血腐敗化為膿膿潰之後其瘡不瘥故曰癰瘡

腸癰候

腸癰之狀小腸微強而痛是也由寒熱氣搏於腸間血氣否結所生也

癰候

腫結長一寸至二寸名之為癰亦如癰熱痛久則膿潰捻膿血盡便瘡亦是風寒之氣客於皮膚血氣壅結所成凡癰癰捻膿血不盡而瘡口便合其惡汁在裏雖瘡終能更發變成漏也

疽候

五臟不調則生疽亦是寒氣客於皮膚折於血氣血氣  
否澀不通結聚所成大體與癰相似所以為異其上如  
牛領之皮而硬是也癰則浮淺疽則深也至於變敗膿  
潰重於癰也傷骨爛筋遂至於死

疽瘡候

此疽瘡者非癰疽也是癰之類世謂之癰疽多發於指  
節脚脛間相對生作細痞瘤子市市而細孔瘡裏有蟲

痒痛搔之有黃汁出隨瘡隨發也

癰候

寒熱邪氣客於經絡使血氣否澀初生作細癰癰或如梅李核大或如箭幹或圓或長者至五六分不過一寸或一或兩三相連時發寒熱仍膿血不止謂之漏也是皆五臟六腑之氣不和致血氣不足不受寒熱邪氣然癰者有鼠癰螻蛄癰蚯蚓癰蟻螬等癰以其於當病名處說之也

癩候

癩者風濕搏於血氣所成多著手足節腕間市市然搔之痒痛浸淫生長呼謂之癩以其瘡有細蟲如癩蟲故也

疥候

疥瘡多生手足指間染漸生至於身體痒有膿汁按九蟲論云蟯蟲多所變化亦變作疥其瘡裏有細蟲甚難見小兒多因乳養之人病疥而染著小兒也

癬候

癬病由風邪與血氣相搏於皮膚之間不散變生隱軫軫上如粟粒大作匡郭或邪或圓浸淫長大痒痛搔之有汁名之為癬小兒面上癬皮如甲錯起乾燥謂之乳癬言免飲乳乳汁漬汚免面變生此仍以乳汁洗之便瘥

赤疵候

小兒有血氣不和肌肉變生赤色染漸長大無定或如

錢大或闊三數寸是也

臍瘡候

臍瘡由初生斷臍洗浴不即拭燥濕氣在臍中因解脫遇風風濕相搏故臍瘡久不瘥也臍瘡不瘥風氣入傷經脈則變為癰也

蟲胞候

小兒初生頭即患瘡乃至徧身其瘡有蟲故因名蟲胞也

口瘡候

小兒口瘡由血氣盛兼將養過濕心有客熱熏上焦令口生瘡也

鵝口候

小兒初生口裏白屑起乃至舌上生瘡如鵝口裏世謂之鵝口此由在胎時受穀氣盛心脾熱氣熏發於口故也

驚口生瘡候



此由脾胃有客熱熱氣熏發於口兩吻生瘡其瘡白色如燕子之吻故名為燕口瘡也

口下黃肥瘡候

小兒有涎唾多者其汁流溢浸漬於頤生瘡黃汁出浸淫肥爛挾熱者瘡汁則多也

舌上瘡候

心候於舌若心臟有熱則舌上生瘡也

舌腫候

心候舌脾之絡脈出舌下心脾俱熱氣發於口故舌腫也

噤候

小兒初生口裏忽結聚生於舌上如黍粟大令兒不能取乳名之曰噤此由在胎時熱入兒臟心氣偏受熱故也

凍爛瘡候

小兒冬月為寒氣傷於肌膚搏於血氣血氣壅滯因即

生瘡其瘡亦焮腫而難瘥乃至皮肉爛謂之為凍爛瘡也

### 金瘡候

小兒為金刃所傷謂之金瘡若傷於經脈則血出不止乃至悶頓若傷於諸臟俞募亦不可治自餘腹破腸出頭碎腦露並亦難治其傷於肌肉淺則成瘡終不慮死而金瘡得風則變瘰

### 卒驚瘡候

此由金瘡未瘥忽為外物所觸及大啼呼謂為驚瘡也  
凡瘡驚則更血出也

月食瘡候

小兒耳鼻口間生瘡世謂之月食瘡隨月生死因以為  
名也世云小兒見月初生以手指指之則令耳下生瘡  
故呼為月食瘡也

耳瘡候

瘡生於小兒兩耳時瘥時發亦有濃汁此是風濕搏於

血氣所生世亦呼之為月食瘡也

浸淫瘡候

小兒五臟有熱熏發皮膚外為風濕所折濕熱相搏身體其瘡初出甚小後有膿汁浸淫漸大故謂之浸淫瘡也

王灼惡瘡候

王音旺

腑臟有熱熱熏皮膚外為濕氣所乘則變生瘡其瘡偏盛者其瘡發勢亦成初生如麻子須臾王大汁流潰爛

如湯火所灼故名王灼瘡


疳濕瘡候

疳濕之病多因久利脾胃虛弱腸胃之間蟲動侵蝕五臟使人心煩惱悶其上蝕者則口鼻齒斷生瘡其下蝕者則肛門傷爛皆難治或因久利或因臟熱嗜眠或好食甘美之食並令蟲動致生此病也

陰腫成瘡候

小兒下焦熱熱氣衝陰陰頭忽腫合不得小便乃至生

瘡俗云尿灰火所為也



巢氏諸病源候總論卷五十